

KALE ISTILUAK. Madrilen deklaratu zuen atzo

Donostian atxilotu gaztea kartzelatu egin dute

Autobus bat erretzeaz akusatu dute, baina berak akusazio guztiak ukatu ditu

Erredakzioa | DONOSTIA

Ertzaintzak ostiralean Donostiako Antigua auzoan atxilotu zuen Nader Koochaki Etxeberria, 18 urteko gaztea, espetxeratu egin zuten atzo Espainiako Entzutegi Nazionalen deklaratu ondoren. Gaztea inkomunikatuta egon da asteburuan. Une orotan bere aurkako akusazioak ukatu dituen arren, Baltasar Garzon epaileak Soto del Realen espetxeratzeko agindu zuen atzo.

Gazteari abuztuaren 12an Donostian autobus baten erretetan parte hartu izana leporatzen dio Ertzaintzak, eta «gertaeraren larritasunean» oinarrituta argudiatu zuen epaileak erabakia. Amnistiaren Aldeko Batzordeek adierazi zuten, baina

Ertzaintzaren arabera, autobusa erre zuten tokitik gertu dagoen baserri huts batean hainbat material atzeman zuten, eta baita gaztearen hatz markak ere. Aipatu iturrien arabera hatz marka horiek plastiko garden batean daudela dio Ertzaintzaren kontakizunak, ez kale istiluekin lotutako materialean. Hala, gazteak atzo esan zuen litekeena dela horrelako plastikoa erabili izatea, baina ez duela zerikusirik kale istiluekin.

Ertzain etxean izan den hiru egunetan ziegako argia piztuta izan duela salatu zuen gazteak, eta irainak jasan behar izan dituela. Deklarazioa Baltasar Garzonek hartu zion arren, auzia 3. instrukzio epaitegiaren esku dago, Teresa Palacios epailearen esku.

LABURREAN

Desobedientzialariek eta Eusko Abertzale Ekintzak asteburuko ekitaldietan parte hartzera deitu dute

Desobedientzia Zibilaren Egunak iragango dira larunbatean eta igandean Zarautzen, Burujabetzaren Aldeko Desobedientzialariek, ekimen bateratuan parte hartzera deitzeaz gain, bertan Espainiako eta Frantziako nortasun agiriaren bilketa egingo dutela jakinarazi dute. Udan jada «inposatutako ehun karnet» bildu dituzte. Eusko Abertzale Ekintzak, bestalde, desobedientzia zibilaren alde Euskal Herrian ekintzak bultzatzen dituzten bost taldeen arteko elkarlana txalotu, eta bat egin du Zarauzko ekimenarekin. Desobedientzia eta intsumisio bidea «oso eraginkorra» dela dio EAEk, eta parte hartze zabala eskatu du «Estatuen jarrera antidemokratikoari aurre egiteko».

Zabalik programarekin Eusko Legebiltzarreko taldeekin harremanak eduki ahal izango dira

Zabalik programa abian jarri du Eusko Legebiltzarra, eta, urte amaierarako, herri-tarrek talde parlamentarioekin zuzeneko harremanak eduki ahal izango dute, iritzia, informazioa, txostenak eta abarrak helaraziz. Atzo aurkeztu zuen programa Legebiltzarreko presidente Juan Maria Atutxak, eta, ekimen horrekin, erakundea «kristalezko kubo» bilakatu nahi dutela adierazi zuen. Osoko bilkura eta batzordeetako eztabaidak jarraitu ahal izango baitira internet bidez, nonahitik.

Sudupek Gipuzkoako aurrekontuez talde guztiekin hitz egin nahi du, Batasunarekin ezik

2002. urteko aurrekontuak negoziatu egin behar ditu Gipuzkoako Batzar Nagusietako gobernu taldeak, eta Roman Sudupe ahaldu nagusiak atzo adierazi zuen «talde guztiekin» hitz egingo dela, «indarkeria gaitzesten ez dutenekin izan ezik». Iragan ostiralean, Politika Orokorrari buruzko batzarrean, PSE-EE prest azaldu zen EAJ-EA taldearekin aurrekontuetaz eztabaidatzeko. Sudupek, sozialistei erantzunez, «jarrera irekia» izango dutela esan zuen atzo.

MOBILIZAZIOAK

'Alde hemendik' aldarrikapenaren baitan zenbait ekimen ari dira egiten

Erredakzioa | DONOSTIA

Espainiako eta Frantziako segurtasun indarrak Euskal Herri-tik joan daitezkeen eskatzeko ekimenak ugaritu egin dira urriaren 12a heltzen ari den heinean. Jakina denez, *Alde hemendik* aldarrikapenarekin manifestazioa egingo da egun horretan Iruñean. 17:00etan abiatuko da Antoniutti parketik, eta Amnistiaren Aldeko Batzordeek bertara joateko deia egin dute.

Ostiraleko ekimen nazional horretaz gain, egunotan beste hainbat egin dira. Adibide gisa hilaren 3an Zarautzen eginiko elkarretaratzea edo 4an Donostian eginiko manifestazioa.

Egunotan egingo direnen artean, berriz, bihar Barakaldon elkarretaratzea izango da udaletxean, eguerdian, eta iluntzean Iruñeko Donibane auzoan. Hilaren 11n, Bilboko udaletxean elkarretaratzea egingo dute eguerdian; 19:00etan Oñatin; eta ordubete geroago Audio, Antsoain edo Agoitzen. Ostiralean, azkenik, Iruñekoaz gain, Zaldibian, Atarrabian eta Durangon izango dira ekimenak.

KUTXA AULAK
EUROAREN KANPAINA • 2001

HITZALDIA

"EUROA ETA HIRITARRAK: Nola moldatu moneta berriarekin"

Hizlaria:
AITOR RODRIGUEZ ANABITARTE
Ekonomialaria

SARRERA DOHA INIK

Eguna: Urriaren 10a
Ordua: 19:00etan
Lekua: Arrasate Aretoa (Arrasate, 12) Donostia

www.kutxa.net



kutxa
zuri esker